

**BN Pilih Mah Siew Keong Berdasarkan Pengalaman dan Jasanya di Teluk Intan -
Muhyiddin
Bernama
Mei 19, 2014**

TELUK INTAN, 19 Mei (Bernama) -- Pengalaman dan jasa Datuk Mah Siew Keong membangunkan kawasan Parlimen Teluk Intan sebelum ini antara faktor beliau dipilih semula bagi mewakili Barisan Nasional (BN) dalam pilihan raya kecil (PRK) kerusi Parlimen Teluk Intan.

Timbalan Perdana Menteri Tan Sri Muhyiddin Yassin berkata Mah, yang sebelum ini anggota Parlimen Teluk Intan selama dua penggal sejak pilihan raya umum 1999, amat dikenali di kawasan ini dan mampu berkhidmat kepada masyarakat di kawasan itu.

Beliau berharap 60,349 pemilih berdaftar di kawasan ini, termasuk 59,927 pengundi biasa, memberikan sokongan kepada Mah, yang merupakan anak jati Teluk Intan.

"Pucuk pimpinan memilih Mah berdasarkan pengalamannya dalam kerajaan dan parti, (tambahan pula) masyarakat di kawasan itu mengenali beliau yang telah banyak berjasa kepada mereka," katanya kepada pemberita selepas proses penamaan calon PRK Parlimen Teluk Intan di Sekolah Menengah Kebangsaan Seri Perak di sini, Isnin.

Pilihan raya kecil Parlimen Teluk Intan menyaksikan pertandingan satu lawan satu antara Mah, 53, dan calon DAP Dyana Sofya Mohd Daud, 27.

Pilihan raya kecil itu diadakan berikutan kematian penyandang kerusi Parlimen itu, Seah Leong Peng, 48, daripada DAP akibat kanser pada 1 Mei lepas

Ditanya mengenai Mah yang dianggap sebagai calon kitar semula, Muhyiddin berkata: "Ini bukan calon kitar semula. Saya dah beberapa kali recycle. Yang penting kita tahu apa harapan pengundi di sini."

Ini adalah kali kelima Mah bertanding di kerusi Parlimen Teluk Intan, dengan kali pertama pada PRU 1999 dan terakhir pada PRU 2013. Beliau memenangi kerusi itu pada PRU 1999 dan PRU 2004, dan kalah kepada calon DAP pada PRU 2008 dan PRU 2013.

Muhyiddin berkata: "Memang dalam keadaan tertentu ada menang dan kalah. Kali ini kita harap trend akan berubah sebab kita telah membuat keputusan secara mendalam, bukan sambil lewa atau semberono."

Menyentuh mengenai ibu Dyana Sofya, iaitu Yammy Samat, 59, yang merupakan anggota Umno, Timbalan Pengerusi Barisan Nasional itu berkata ia bukan risiko kepada parti komponen itu.

"Kita tidak mengambil kira latar belakang (calon lawan atau DAP), siapa ibunya dan keluarganya. Yang penting, kita hendak menjual calon kita yang baik, segar, bertenaga dan banyak pengalaman," katanya.

Ditanya mengenai peluang BN pada PRK ini, Muhyiddin berkata: "Kita 50-50 setakat hari ini, walaupun kita yakin trend pengundi juga akan berlaku dalam beberapa hari mendatang, sama ada mereka (pengundi) dipengaruhi oleh parti yang bertanding."

Muhyiddin berkata BN telah menggerakkan jenteranya di semua peringkat, dan "yang penting jentera parti kita akan bergerak, (dan) kita mesti yakinkan pengundi dengan dasar BN yang kita bukan parti perkauman, kita parti untuk semua kaum."

" Itulah yang kita telah dan akan laksanakan," katanya.

Beliau berkata jentera BN pada PRK kali ini lebih padu jika dibandingkan sebelum ini, dan atas dasar itu, " saya yakin kita berupaya untuk menggerakkan jentera sehingga memperoleh kejayaan."

Pengundian awal PRK Parlimen Teluk Intan akan diadakan 27 Mei ini, manakala pengundian ditetapkan pada 31 Mei.

Muhyiddin kemudian mengadakan pertemuan dengan anggota jentera BN bagi Pusat Daerah Mengundi di Rumah Rehat Teluk Intan.

Turut hadir Pengerusi Badan Perhubungan Umno Negeri Datuk Seri Dr Zambry Abdul Kadir dan Setiausaha Agung Umno Datuk Seri Tengku Adnan Tengku Mansor serta calon BN Mah.

Pertemuan yang diadakan pada pukul 12 tengah hari berlangsung selama sejam.

Timbalan Perdana Menteri kemudian berlepas pulang ke Kuala Lumpur.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1039299>